

**DE GLORIOSISSIMA
CHRISTI DOMINI
RESURRECTIONE
ORATIO HABITA
TERTIO NONAS...**

Ascanio Ercolani, Valenti Gonzaga



BEATISSIME PATER.



*N*ihil mihi aut optabilius, aut illustrius contingere potuit, BEATISSIME PATER, quam ut incultam hanc Orationem maximi omnium Pontificis Nomine cohonestatam in lucem traderem, ex cujus amplitudine, ac dignitate ejus tenuitas subleuetur. Id plane singulare beneficium humanitati Tuæ prorsus adscribitur, quæ tanta est, ut cum in aliis virtutibus neminem Tibi anteponeere, in hac ne conferre quidem possim. Miramur sane magna illa, ac præclara ornamen-

ta, quæ Te jampridem ad summum Imperium extulerunt ; videlicet excellentem in rebus omnibus constituendis æquitatem ; liberalem in Cives universos , vexatasque diuturna calamitate Provincias beneficentiam ; eximium denique paternæ voluntatis studium , quo turbulentis his bellorum temporibus nihil enixius contendisti , quam ut dissidentes inter se Principes ad concordiam revocares . Hæc , & alia plurima de Te unanimi voce prædicantur , quæ , non qui laudibus efferat , assentator , sed qui non laudet , aut omnino stupidus , aut malevolus existimetur ; sed nihil magis in admirationem pertrahit , quam nota satis , ac perspecta benignitas , qua , licet gravissimis curis distentus , omnibus tamen adeundi Tui facultas conceditur ; ita ut , quamvis in hac altissima honoris Sede collocatus Principibus omnibus excellas , infimos etiam , ac supplices incredibili facilitate completaris . Quoniam igitur id tribuisti humanitati Tuæ , ut exiguum hoc ingenii mei monumentum susciperes ; tribue idem constantiæ , ut me susceptum amplissimo Tuo Patrocinio tuearis , ac foveas .

ORATIO.



ÆTANDUM magnopere nobis est, BEATISSIME PATER, dum Salvator Dominus ex mortuis resurgens Divinitatem suam terreni corporis humilitate contextam certissimo testimonio comprobavit. Nam cum ille obierit quidem mortem, quia creatus, & in similitudinem hominum factus, dirupit sane mortis vincula, quia Creator, & omnem pristinae infirmitatis suspicionem inusitato Triumpho splendore delevit: Quid autem jucundius contingere poterat, quam ut Parentem nostrum amantissimum, & communis omnium salutis Auctorem tanto honore, tantaque amplitudine exornatum intueremur? Quamquam non illius tantum gloria Fidelium animos exhilarat, sed nova etiam, ac singularis dignitas, quæ naturæ hominis ab ipso susceptæ tribuitur, maximum lætitiæ præbet argumentum. Videmus quidem illam hodierna die in sublimiorem lucem evectam, quam cum Dei Filius ad reparandum genus nostrum, ipsam sibi ineffabili beneficio copulavit.

*S. Ambr. in
Simb. cap. 12.*

*Ad Philip.
cap. 2.*

*Ad Hebr.
cap. 2.*

Matth. 26.

*Petr. ep. 2.
cap. 3.*

Joan. 6.

Mirabilis sane dignatio ! Cum Verbum in forma Dei esset , semetipsum exinanivit formam Servi accipiens , ut illam arctissimo vinculo cum sua Divinitate conjungeret . Cum tamen per mortem hominis suscepti vellet eum destruere , qui habebat mortis imperium , & liberare eos , qui per totam vitam obnoxii erant servituti ; ideo naturam nostram ita sibi adjunxit , ut tamen insitam divinitatis virtutem , atque splendorem in ipsam diffundi non pateretur . Hinc sævissimis tormentis excruciarı potuit ; hinc ipsius Anima futuræ passionis acerbitate proposita tristis fuit , & mortis horrore perturbata . Quare licet humanitas nostra se participem divinitatis jampridem gloriaretur , suis tamen incommodis , veluti gravissimo pondere minime levabatur . Hodie tandem amplissimam triumphı gloriam assequuta , veterem infirmitatem exuit ; & laxata (ut ita dicam) divinitatis virtute , quæ prius tegebatur , tanta luce undequaque circumfunditur , ut nihil , nisi immortale , nisi divinum præferat . Fidelis Deus , quia non tardat promissionem suam ! Cum cœlestis Reparator non venerit facere voluntatem suam , sed ejus , qui misit illum ,

hæc inde retributio a Deo est, ut ei cor-
pori, quod assumpsit, paternæ gloriæ do-
netur æqualitâs. O præclaram, o ineffa-
bilem naturæ nostræ dignitatem! Quæ
modo suis cruentata vulneribus, atque
neglecta in sepulchro delituit; nunc in
eum locum adducitur, ut ad immortali-
tatem perducatur, & in cœlestibus collo-
cetur. Perpendite arcanum mysterium,
longe ante in virga Aaron significatum;
quæ sicut arescentibus foliis in tabernacu-
lo posita, cum inde per Moysen educe-
retur, germinavit, & turgentibus gemmis
flores eruperunt; ita Salvatoris humanitas
ad immortalem vitam revocata novis adeo
splendoribus coruscat; ut, licet veterem
originis suæ materiem retineat, in divi-
nam ferme speciem, atque imaginem,
translata esse videatur. Jam ipsius fragili-
tas in beatam incorruptionem, jam tota
abjectio in sempiternam gloriam feliciter
convertitur; jam denique homo, ut ex-
clamat S. Hilarius, factus est Deus; supe-
ravit enim magnitudo Domini parvitatem
servilis formæ. Neque sane eam gloriam,
licet eximiam, qua Filius hominis in ver-
tice Thabor clarificatus est, comparemus;
cum resplenduit facies ejus, sicut Sol, ita

*S. Hilar. in
psal. 141.*

*S. Ambr. in
Simb. cap. 31.*

Nam. 17.

*S. Hilar. in
psal. 55.*

Matth. 9.

*S. Ang. in
Evang. Joan.
tract. 63.*

*S. Bern. de di-
lig. Deo cap.
10.*

*Ad Ephes.
cap 5*

*Ad Rom.
cap. 8.*

*Joann. ep. 1.
cap. 1.*

ut intuentium discipulorum oculos simul obtunderet, eosque incredibili gaudio recrearet. Tunc enim nondum fuerat mortalitas immortalitate vestita, nec in æternam virtutem temporalis infirmitas commutata. Nunc denique naturæ humanæ amplitudo in Parente nostro perficitur, cum omni prorsus ægritudine spoliatur: Nunc veluti Solis luce perfusus aer in eandem transformatur luminis claritatem, adeo non tam illuminatus, quam ipsum lumen videri possit; ita susceptus homo Divinitatis effuso splendore sic illustratur, ut eum prope divinum agnoscamus. Quare, cum facti simus lux in Domino, & conformes imaginis Filii sui, opera lucis amplectamur; nam si in luce non ambulamus, & habere cum ipso societatem dixerimus, mentimur, & veritatem non facimus.



F I N I S.